

Mesi Tolu Na JONE Naio Bivitauiāio Verialiano Moti

Tukunuano bulati na niosi nei

Jone kiano mēsi tolu nene, naio bio bere naio ber naio be “Navagadeano” ana naio bivitauiā ban toro tai, siano Kaeas, napano be navurumāraboiano tai ea yimo lu. Naio miaia Kaeas bior napano naio jo mijai namoneano nalo, a berkakar banio ka takisor re bajago na toro va tai napano siano Diotreves.

Torogio nalo na niosi nei

Iliano moti 1-4

Navagadeano miaia Kaias 5-8

Navagadeano milkuei ka Tiotrivis 9-10

Navagadeano jaaro ka Dimitrius kiano bajago
11-12

Iliano maariano 13-15

Iliano na be moti

¹ Kiniou tormoruo navagadeano, nebivitauiā mēsi nei ka riviedu vāso, kuruaku Kaias. Peli kito tealō ajumā amiliaso kija, mia kiniou nojidom nover kaso never kiniou najaaro toru ka neviviūoso ea mēsi nei, bior kiniou tinieku jīso toru, jakii bajago novo na ilirianiano na Tubo kanano.

² Kanaku bibilu novo, nemijikia ka jau kojomãa komijog bo damãariga napano kanamo meuliano naio jo bo ea Atua jumãano ruei, mia nojomãa nobolkouo kaso julaka, ka kanamo imãauano nalo atu aiel rivu, a ka ve re mieiano tai ka rila bulag mokotenamo. ³ Vonganei maka vesiou laka vo, ana kuruado nalo tealo abinimei aboru ea vio nei, ana nalo ajukunu ban kiniou jumãabe ka jau kojomãa kajakii Tubo kanano ilirianiano, a jau kojomãa komila kanano imãauano novo nalo banbano-o na tomu nalo abitulubar ka kanamo meuliano naio memedu riano ga. Kanalo veriano nei naio mila tinieku jaaro-o mia jaaro toru laka. ⁴ Maka ve todolu tai napano mia mijikia rila kiniou nojog rivu tibe nei, mia bogo na ga nomijog ka keneriku nalo aju ajumolu aju jikili ea Tubo kanano ilirianiano, naina naruei namial bo laka.

Kaias naio be toro tai na mãa amijikia ka abarkar tinielo ea naio

⁵ Kiaku bilbilu na bo, siva toru banso ka imãauano nalo na mãa jau komila ka mijai nalo na mãa aju amial bija Ioluanu Vou na bo, na abiedu aboru ea kamiu. Nalo abiedu jibe ka na nalo abe valauo ga, naruei tealo maka asidom avitikarlo, mia jau komijuku bo toru laka banlo. ⁶ Nalo abinimei aberialio ea mirano namonea nalo na lotuano na vio na ruei, aju ajukunu ka kanamo imãauano na bo na kanamo tinietiano. Naruei tomu ta bunu abiedu bereio aju kamliko vonganei, naruei nebika denso ka jau kajailo bunu. Ana vere ala nonovio imãauano ribisi, mia bo ka ver kamiu kuvitii kiri titai ve telisu ka

riijailo ea kanalo m̃arabo, tibe ka na memedu ka ala van toro na mila Atua kanano iñauano. ⁷ Nalo na, amiel bior vite na ga, ana bogo na m̃a aju aba amioliolu ban nalo na m̃a maka amonea vo, nalo maka atu asidom ka nalo na monoka avitikarlo ka vite tai, bior nalo maka ave namoneano vo. ⁸ Mia kito namoneano nalo, tenei joa kito ka rajailo. Bo ka kito rotunukakarlo, a roikurkarlo, ka rila ka mia kito bunu reiasol vijalo, kito nonovio robe tomu na romiñau vei ka Tubo kanano ilirianiano.

Tiotrivis naio bitikar lotuano maka rimemedu

⁹ Peli jau komijikia ka kiniou nebitauia m̃esi tai bior vite na ban namoneano nalo ea lotuano ruei, mia Tiotrivis nei, napano naio jidom ka naio rive tubo kalo, naio maka rivitilubar kiniou, naio maka sidom riiagago ka kanaku iliano, naio jokovio ka Tubo kanano iñauano napano m̃a kumemi numitu numila. ¹⁰ Naio jom̃a mil m̃ele, a jom̃a ber iliano telabo na bova ii kumemi, naio mila sibi niegeniege kumemi toru laka. A maka ve iliano na bova ga, mia be iñauano na bova bunu, bior bogo na m̃a Atua kanano tomu nalo amiyoyotuba ka kamiu, naio maka sidomlo, naio ber avan bereio ga. Mia mave ka naina, bogo na kam tealó ka kamiu, kubitikar nalo, kumijailo ka ala iñauano na abinimei kario, mia kema nei naio jumolu buk bulag kamiu den lotuano bunu. Vite nalo nei na m̃a naio jo mila nei naio maka rimemedu na, mia bogo na kiniou neviedu nomiyotuba kean kamiu, mia roviniu rava vio takurano ka roverii ka mia rala venia van naio. ¹¹ Kanaku bilbilu, nojidom never kaso ka kema

nei mila kirivova kaso mia maka rivu ka rila jau bunu, jau kala rivova van naio bereio. Monoka kito rovijauia re bajago na bova ga, mia bo ka rovijauia bajago na bo. Toro na ña mila bo ban toro dolu, naio be Atua kiano toro riano, mia toro na ña mila bova ban toro dolu, naio maka rial Atua vo, naio jo koalabo kia ga vo.

Dimitrias naio be toro na bo laka tai

¹² Mia Dimitrias nei, naio mia riijaso. Tomu nalo tinielo ea naio, nalo aberenio aberinavo naio miñau bo laka, mia Atua kanano iliano naio jomña berii bajago na joa kanano meuliano, berinavo abo laka. Mia kiniou bunu nemial naio be toro na bo tai, ana nemijikia ka jau komonmonea kanaku iliano, ka monoka never ve riano ga vanso.

Iliano na maaro

¹³ Vite miroano na ka never kaso aju kiano vo, mia maka nosidom nevivitaui toa ñesi vonganei. ¹⁴ Mia nojidom ka mia neviedu neial kamiu rivesiou re, naruei mia romijikia rovitii mirado, reil van kito.

¹⁵ Tuñaro to vija jau Kanado bilbilu nalo na ea vio nalo nei aberen aberinavo Atua milivu kaso. Aiou koig, jau kover ka kanado bilbilu nalo aviniu na ña kumitu na, ka mia Atua riilivu bunu ka kamiu.

Peli naina ga na kiniou nojidom noverenio, iliano bisi ea ga vio na.

Verikariano Vou Na Baki
The New Testament in the Baki language of Epi,
Vanuatu
Le Nouveau Testament en Baki langue de l'île d'Épi
au Vanuatu — Niutestamen long Baki lanwis, blong
Epi Aelan, Vanuatu

copyright © 2016 Wycliffe Bible Translators, Inc.

Language: Baki

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 21 Feb 2024 from source files dated 31 Aug 2023

f1528695-aae7-544e-aadd-9084a3830ae4